

COLUMNA

Per il solit

 ERWIN ARDÜSER

Ils termins da las radunanzas da vischnanca èn nudads en mia agenda. Per il solit sun jau adina preschent cura ch'igl è lura d'approvar il preventiv, il quint ed il rapport annual, sancziunar il project per renovar las vias ubain eleger persunas che s'engaschan per il bainstar da nossa cuminanza.

Per il solit n'èn questas radunanzas betg fitg spectacularas. Per il solit vegnan preschentads preventivs e quints gulivads – schizunt tals cun avancements. Per il solit na datti betg grondas discussiuns: ni per il preventiv, il quint, ed era betg per projects. La fidanza en la suprastanza è gronda – e forsa n'han ins simplamain betg gust da far tgutgas dumondas, da prolungar la radunanza.

Per il solit è l'interess, è la preschientscha in zichel pli gronda, il mument ch'igl è d'occupar in post u l'auter. Las mirveglias tge candidats/as che sa mettan



a disposiziun pon esser il motiv principal – in auter: sustegnair e dar la vusch al collega, a la collega ch'è pront/a da s'engaschar.

Per il solit n'è la schelta en connex cun elecziuns betg starmentus gronda. Per il solit datti in/a candidat/a per il post che sto vegnir occupà. Per il solit essan nus cuntents d'avair chattà ina persuna che sa metta insumma a disposiziun.

Per il solit va adina la medema glied a radunanza. Per il solit tegnan adina ils medems si il maun per far dumondas. Per il solit – sche nus n'avain betg

gist ina pandemia ch'impedescha quai – van blers suenter radunanza en ustaria.

Per il solit cumenza ussa la discussiun! «Pertge na stas ti betg a disposiziun per in post? Essan nus propi persvadids dal project ch'è gist vegnì sancziunà? Na fisis betg il mument da reponderar la strategia turistica? E pertge en ils custs per la scola danovamain cre-schids?»

Betg adina, ma savens, cumenza la discussiun pir suenter la radunanza. Per il solit fiss ussa finalmain arrivà il mument per motivar ils candidats e las candidatas ch'ins n'aveva betg chattà fin qua, per dir quai ch'ins vuleva schon adina dir, far las dumondas ch'ins vuleva schon adina far.

Pertge na faschain nus la proxima radunanza da vischnanca betg suenter la proxima radunanza da vischnanca?

Erwin Ardüser abitescha a Laax e lavora en l'administraziun da RTR.